

Dörfligeischer 1996

Der Löie z' Madretsch e Brandruine,
Uf e Gassme-Platz darfsch mit em Outo nid ine,
Ds Touring de la Gare, das isch ou läär,
Im Bielerhof, do krachet's schwär,
Mir Dörfligeischer finge das glatt,
Biel isch würklech e Geischer-Stadt !

Geschter seit ds Liseli zum Maa, em Otto:
"Das Wuchenänd mach ig es Lotto,
Lueg mi nid so deppert a,
I weiss, dass i no nie gwunne ha,
Mit em ne Sächser vermöge mir's bigoscht,
Üsi Wiehnachts-Chärtli z' verschicke mit der Poscht !"

Ta-tü, ta-ta, ta-tü, ta-ta,
Ta-tü, ta-ta, ta-tü, ta-ta,
Si frogt sich, weli Ambulanz chunnt do,
Oder isch's am Änd nume ds Poschtouto
Vom schwitze nass, was söll das bedüte ?
Do erwachet d' Marie-Pierre, wiu der Wecker hett glüte !

Jetz schriibe doch es paar riichi Persönli,
Äs Wiis-Buech mit so grosse Visiönli,
Giengs nach dene Hirni voller Spönli,
Wär mir do inne alles Clöwnli,
Für alli Lüt mit chline Löhnli
Gäbs numeno Ghackets ohni Hörnli
Und der Herr de Püree ganz persönlü,
Schefflet witer Milliönli !

I üser Stammbeiz, hei mer chlei überhock't
Do seit e Polizischt wo's hett aaglockt:
Das choschtet füzfig Stutz, machet ds Gäld parat,
Derfür hani euch e guete Rat:
Wenn dir z' nöchsch Mou überhöckle weit,
Lueget, dass dir der Sheriff binech heit !

Üsi Schwizer Nati gfaut üs guet,
Si zeige in Schwede ou no Muet,
Die Plakat-Aktion hei mir unterstützt,
Doch leider hett das alls nüt gnützt.
Mir hei drum do die gliichi Idee:
Viellech erreiche mir mit "Stop it Blocher" meh !

Zwe Boxer im Ring gä nang ufe Gring,
Das isch ganz normal, die wei jo die Qual,
Ou im Ischhockey, git's e Schlägerei,
Wenn's e Gägner isch, wo nid sportlech isch,
Der EHCB, macht's em Gägner ring,
Die gäbe sech sälber ufe Gring !

Bim Papscht isch es wichtigs Gloubenskapitel,
Bruchet kei Verhüetigsmittel.
Bim Bischof Vogel gilt das o,
Drum hett si Gliebt es Ching übercho.
Jetz, liebe Papscht dänk ändlech um:
Im Minimum e Gummi drum !

Letscht Wuche heit dir's gläse, im Tägu isch es gschtange:
Der Oberfou isch mit em Aerni zu de Läder-Ärsch gange,
Und der Aerni bsteut e Stange u kei Mönsch hett ihn verstange !
Drum loset jetz zue, fall's es euch interessiert,
Wenn in Wien e Stange wosch, us langsam chlei pressiert,
De seisch ganz eifach „ein Helles, Ober Zack ein Helles“
ein Helles, Ober Zack ein Helles ...